

BOSNA I HERCEGOVINA
Konkurencijsko vijeće



БОСНА И ХЕРЦЕГОВИНА
Конкуренијски савјет

ZAKLJUČAK

**o odbacivanju Prijave koncentracije privrednog subjekta „AS Holding“ d.o.o. Jelah,
Tešanj**

**Sarajevo
oktobar, 2018. godine**



Broj: UP-05-26-1-013-15/18
Sarajevo, 18.10.2018. godine

U skladu sa članom 25. stav (1) tačka e), a na osnovu člana 42. stav (2), u vezi s članom 14. Zakona o konkurenciji («Službeni glasnik BiH», br. 48/05, 76/07 i 80/09), a rješavajući po Prijavi koncentracije privrednog subjekta „AS Holding“ d.o.o. Industrijska zona Ekonomija bb, 74264 Jelah-Tešanj, zaprimljenoj dana 04.06.2018. godine pod brojem: UP-05-26-1-013-1/18, Konkurencijsko vijeće, na 39. (tridesetdevetoj) sjednici održanoj dana 18.10. 2018. godine, donijelo je

Z A K L J U Č A K

1. Odbacuje se Prijava koncentracije privrednih subjekata „AS Holding“ d.o.o. Industrijska zona Ekonomija bb, 74264 Jelah-Tešanj i Zenička Industrija Mlijeka d.d. Zenica, Kanal broj 32 Zenica, radi nepostojanja obaveze prijave koncentracije, u smislu člana 14. stav (1) Zakona o konkurenciji.
2. Ovaj Zaključak bit će objavljen u «Službenom glasniku BiH», službenim glasilima entiteta i Brčko Distrikta Bosne i Hercegovine.

O b r a z l o ž e n j e

Konkurencijsko vijeće Bosne i Hercegovine (dalje u tekstu: Konkurencijsko vijeće) je dana 04.06.2018. godine pod brojem: UP-05-26-1-013-1/18 zaprimilo, Prijavu koncentracije (dalje u tekstu: Prijava), podnesenu od strane privrednog subjekta „AS Holding“ d.o.o. Industrijska zona Ekonomija bb, 74264 Jelah-Tešanj (dalje u tekstu: AS Holding ili Podnosilac prijave), koja se odnosi na sticanje kontrole nad privrednim subjektom Zenička Industrija Mlijeka d.d. Zenica, Kanal broj 32 Zenica (dalje u tekstu: ZIM). Podnosilac navodi da je na 21. redovnoj sjednici Skupštine dioničara privrednog subjekta ZIM održanoj 14.05.2018. godine, u skladu sa Zapisnikom sa Skupštine obrađenim od strane notara pod brojem OPU-IP:219/2018 stekao kontrolu, tako što su u skladu sa tačkom pod rednim brojem 6. *Donošenje odluke o imenovanju tri člana Nadzornog odbora privrednog subjekta ZIM*, sva tri izglasana člana Nadzornog odbora prijedlozi privrednog subjekta AS Holding, i to: Amer Bektaš, glasalo 135.495 glasova/dionica, Rusmir Hrvić, glasalo 135.495 glasova/dionica i Madžid Avdagić, glasalo 135.495 glasova/dionica.

Podnosilac prijave je istu samoinicijativno dopunio dana 12.06.2018. godine podneskom broj UP-05-26-1-013-2/18, dana 26.06.2018. godine podneskom broj UP-05-26-1-013-3/18 i dana 03.10.2018. godine podneskom broj UP-05-26-1-013-12/18.

Uvidom u podnesenu Prijavu Konkurencijsko vijeće je utvrdilo da ista nije kompletna, u smislu člana 30. Zakona o konkurenciji („Službeni glasnik BiH“, br. 48/05, 76/07 i 80/09) (u daljem tekstu: Zakon) i čl. 9. i 11. Odluke o načinu podnošenja prijave i kriterijima za ocjenu koncentracije privrednih subjekata („Službeni glasnik BiH“, broj 30/10), te je Podnosiocu prijave dana 03.07.2018. godine uputilo zahtjev za dopunu prijave broj: UP-05-26-1-013-4/18., dana 13.07.2018. godine zahtjev za dopunu broj: UP-05-26-1-013-5/18 i dana 13.08.2018. zahtjev za dopunu broj: UP-05-26-1-013-10/18.

Podnosilac prijave je dana 24.07.2018. godine aktom broj: UP-05-26-1-013-7/18 zatražio produženje roka za dostavu dokumentacije, a što mu je odobreno dana 25.07.2018. godine aktom broj: UP-05-26-1-013-8/18.

Podnosilac prijave je istu dopunio dana 08.08.2018. godine podneskom broj: UP-05-26-1-013-9/18 i dana 22.08.2018. godine podneskom broj: UP-05-26-1-013-11/18.

Podnosilac prijave je naveo, u smislu člana 30. stav (2) Zakona o konkurenciji („Službeni glasnik BiH“, br. 48/05, 76/07 i 80/09) (dalje u tekstu: Zakon) da nema namjeru podnošenja prijave predmetne koncentracije drugim tijelima nadležnim za ocjenu iste, izvan teritorije Bosne i Hercegovine.

Konkurencijsko vijeće je Podnosiocu prijave izdalo Potvrdu o prijemu uredne i kompletne Prijave, u smislu člana 30. stav (3) Zakona, dana 16.10.2018. godine broj: UP-05-26-1-013-13/18.

Konkurencijsko vijeće je iz Prijave utvrdilo slijedeće činjenice:

Podnosilac je prijavu koncentracije prvobitno poslao Konkurencijskom vijeću dana 28.05.2018. godine na adresu Radićeva 8, te je ista vraćena Podnosiocu iz razloga preseljenja Konkurencijskog vijeća na novu adresu (povratnica dostavljena Konkurencijskom vijeću pod brojem: UP-05-26-1-013-3/18) te se stoga smatra da je Prijava koncentracije podnesena u smislu i u skladu s članom 16. stav (1) Zakona.

1. Učesnici u postupku

Učesnici koncentracije po predmetnoj prijavi su privredni subjekt „AS Holding“ d.o.o. Jelah, Tešanj i privredni subjekt Zenička Industrija Mlijeka d.d. Zenica.

1.1. Privredni subjekt AS Holding d.o.o.-Podnosilac prijave

Privredni subjekt AS Holding, sa sjedištem u Ekonomija bb, Jelah, Tešanj, registrovan je u Općinskom sudu u Zenici sa matičnim brojem 43-01-0572-16 i upisanim kapitalom od 100.000,00.

Prema aktuelnom izvodu iz sudskog registra, vlasnici privrednog subjekta AS Holding su fizička lica Sulejman Hrvic, (..)**¹ sa 75% udjela i Rusmir Hrvic (..)** sa 25% udjela.

Osnovna poslovna djelatnost privrednog subjekta AS Holding jeste savjetovanje u vezi sa poslovanjem i ostalim upravljanjem.

1.1.1 Povezana društva Podnosioca prijave

Direktno povezana društva odnosno privredni subjekti u kojima Podnosilac prijave ima udio u vlasništvu su sljedeća:

Tabela 1.

R.br	Naziv privrednog društva	Udio u %	Osnovna djelatnost
1.	AC Food d.o.o.	100	10.82 – proizvodnja kaka, čokolade i slastičarskih proizvoda
2.	Mak Zara d.o.o.	70	10.82 – proizvodnja kaka, čokolade i slastičarskih proizvoda
3.	Solana d.d. Tuzla	16,64	08.93 – vađenje soli
4.	Klass-Con d.o.o.	100	46.70 – Ostala specijalizirana trgovina na veliko

¹ podaci predstavljaju poslovnu tajnu u smislu člana 38. Zakona o konkurenciji

Izvor: Podaci iz prijave

Podnosilac u prijavi navodi da je Predsjednik uprave, odnosno direktor AS Holdinga Rusmir Hrvić istovremeno i član uprave ili nadzornog odbora u sljedećim privrednim subjektima:

1. Napredak d.d. Tešanj, predsjednik Nadzornog odbora
2. Vemal d.d. Tešanj, član Nadzornog odbora
3. Mlin i Pekara d.d. Ljubače, član Nadzornog odbora
4. Solana d.d. Tuzla, član Nadzornog odbora
5. Svjetlostkomerc d.d. Sarajevo, član Nadzornog odbora

Prema navodima iz Prijave direktor i ostali članovi uprave privrednog subjekta ZIM nisu istovremeno članovi uprave ili nadzornog odbora drugih privrednih subjekata.

Podnosilac prijave u istoj navodi da se niti jedno od povezanih društava ne bavi osnovnom djelatnošću koju obavljaju sam podnosilac, niti ciljano društvo predmetne koncentracije.

1.2 Privredni subjekt Zenička Industrija Mlijeka-Ciljno društvo

Privredni subjekt Zenička Industrija Mlijeka d.d., Kanal broj 32 Zenica, upisan je u sudski registar Općinskog suda u Zenici, sa matičnim brojem 43-02-0006-10 i upisanim kapitalom od 2.790.160,00 KM. Ovaj privredni subjekt je u vlasništvu dioničara, a prema listi Registra vrijednosnih papira u Federaciji Bosne i Hercegovine, pet privrednih subjekata sa najvećim udjelima prije koncentracije je sljedeći: Raiffeisen Bank d.d. BiH sa 24,9806% udjela (skrbnički račun), UniCredit Bank d.d. Mostar sa 16,6894 (skrbnički račun), Džananović Transport d.o.o. Zenica 15,9959% udjela, Džananović Salko sa 7,5490% udjela, Karalić Nihad sa 3,2977% udjela i ostali dioničari sa udjelom manjim od 2%.

Podnosilac prijave upisan je u Listu dioničara sa udjelom od 0,1663% što ukupno sa skrbničkim računom UniCredit Bank d.d. Mostar iznosi 16,8557% udjela.

Osnovna registrovana djelatnost privrednog subjekta ZIM jeste proizvodnja mlijeka, mliječnih proizvoda i sira. (10.51 - šifra djelatnosti prema klasifikaciji).

2. Pravni osnov i oblik koncentracije

Podnosilac prijave kao pravni osnov predmetne koncentracije navodi Zapisnik od dana 14.05.2018. godine sa 21. Redovne Skupštine dioničara privrednog subjekta ZIM obrađen od strane notara pod brojem OPU-IP:219/2018 na osnovu kojega su u skladu sa tačkom 6. *Donošenje odluke o imenovanju tri člana Nadzornog odbora privrednog subjekta ZIM*, sva tri izglasana člana Nadzornog odbora prijedlozi privrednog subjekta AS Holding.

Naime, na 21. redovnoj Skupštini dioničara privrednog subjekta ZIM izabrana su tri nova člana Nadzornog odbora, Amer Bektaš, glasalo 135.495 glasova/dionica, Rusmir Hrvić, glasalo 135.495 glasova/dionica i Madžid Avdagić glasalo, 135.495 glasova/dionica, sva tri prijedlozi Podnositelja prijave. Kao dokaz Podnosilac prijave je dostavio i Odluku br.0790 od 14.05.2018. godine kojom se imenuju navedeni članovi Nadzornog odbora.

U skladu sa članom 257. Zakona o privrednim društvima (Sl. Novine Federacije BiH 81/15) Nadzorni odbor dioničkog društva nadležan je da: a) nadzire poslovanje dioničkog društva, usvaja poslovne strategije društva i planove poslovanja; b) nadzire rad uprave, te odobrava odluke strateškog karaktera; c) usvaja izvještaj uprave o poslovanju po polugodišnjem i godišnjem obračunu sa bilansom stanja i bilansom uspjeha i izvještajem revizije; d) podnosi skupštini godišnji izvještaj o poslovanju dioničkog društva koji obavezno uključuje finansijski izvještaj i izvještaje revizora, nadzornog odbora i odbora za reviziju; e) bira predsjednika nadzornog odbora; f) bira upravu i sekretara društva; g) predlaže raspodjelu i način upotrebe dobiti i način pokrića gubitka; h) odobrava kupovinu, prodaju, zamjenu, uzimanje ili

davanje u lizing, uzimanje ili davanje kredita i druge transakcije imovinom, direktno ili posredstvom supsidijarnih društava u toku poslovne godine u obimu od 15% do 33% knjigovodstvene vrijednosti ukupne imovine dioničkog društva po bilansu stanja na kraju prethodne godine; i) predlaže skupštini kupovinu, prodaju, zamjenu, uzimanje ili davanje u lizing, uzimanje ili davanje kredita i druge transakcije imovinom, direktno ili posredstvom supsidijarnih društava u toku poslovne godine u obimu većem od 33% knjigovodstvene vrijednosti ukupne imovine dioničkog društva po bilansu stanja na kraju prethodne godine; j) imenuje predsjednike i članove pododбора zavisno o procijenjenim potrebama; k) obrazuje povremene komisije i utvrđuje njihov sastav i zadatke; l) saziva skupštinu društva; m) odobrava emisiju novih dionica postojeće klase u iznosu do trećine zbira nominalne vrijednosti postojećih dionica i određuje iznos, vrijeme prodaje i cijenu ovih dionica koja ne može biti manja od prosječne tržišne vrijednosti postojećih dionica iste klase u 30 uzastopnih dana prije dana donošenja odluke.

Slijedom navedenog, pravni oblik predmetne koncentracije jeste sticanje kontrole preuzimanjem upravljačkih prava, putem Nadzornog odbora, nad privrednim subjektom ZIM, odnosno, na drugi način, u skladu sa odredbama zakona koji regulišu osnivanje privrednih subjekata i njihovo upravljanje, u smislu odredbi člana 12. stav (1) tačka b) pod 3) Zakona.

3. Pravni okvir ocjene koncentracije

Konkurencijsko vijeće u provođenju postupka ocjene predmetne koncentracija je primijenilo odredbe Zakona, Odluke o utvrđivanju relevantnog tržišta ("Službeni glasnik BiH", br. 18/06 i 34/10), te Odluke o načinu podnošenja prijave i kriterijima za ocjenu koncentracija privrednih subjekata.

4. Relevantno tržište predmetne koncentracije

Relevantno tržište koncentracije, u smislu člana 3. Zakona, te čl. 4. i 5. Odluke o utvrđivanju relevantnog tržišta, čini tržište određenih proizvoda/usluga koje su predmet obavljanja djelatnosti na određenom geografskom tržištu.

Prema odredbi člana 4. Odluke o utvrđivanju relevantnog tržišta, relevantno tržište u proizvodnom smislu obuhvaća sve proizvode i/ili usluge koje potrošači i/ili korisnici smatraju međusobno zamjenjivim, pod prihvatljivim uslovima, imajući u vidu posebno njihove bitne osobine, kvalitet, uobičajenu namjenu, način upotrebe, uslove prodaje i cijene.

Nadalje prema članu 5. Odluke o utvrđivanju relevantnog tržišta, relevantno tržište u geografskom smislu obuhvaća cjelokupnu ili dio teritorije Bosne i Hercegovine na kojem privredni subjekt djeluje u prodaji i/ili kupovini relevantnog proizvoda pod jednakim ili dovoljno ujednačenim uslovima i koji to tržište bitno razlikuje od uslova tržišne konkurencije na susjednim geografskim tržištima.

S obzirom da se tržišta relevantnih proizvoda učesnika koncentracije ne preklapaju, a uzimajući u obzir da se privredni subjekt ZIM kao Ciljno društvo, bavi proizvodnjom mlijeka, mliječnih proizvoda i sira, relevantnim tržištem proizvoda smatra se tržište proizvodnje mlijeka, mliječnih proizvoda i sira.

Kako Ciljno društvo svoju djelatnost obavlja na području Bosne i Hercegovine relevantnim tržištem u geografskom smislu smatra se tržište Bosne i Hercegovine.

U tom smislu, relevantnim tržištem predmetne koncentracije smatra se tržište proizvodnje mlijeka, mliječnih proizvoda i sira u Bosni i Hercegovini.

5. Analiza relevantnog tržišta

Prema podacima iz Prijave procjena tržišnih udjela učesnika koncentracije i njihovih konkurenata na relevantnom tržištu u 2017. godini je sljedeća:

Tabela 2.

R. broj	Naziv privrednog subjekta	Udjel u (%)
1	Mlijekoprodukt d.o.o.	26,19
2	Meggle Mljekara d.o.o. Bihać	18,10
3	Inmer d.o.o. Gradačac	12,07
4	ZZ Zdrava Hrana p.o. Ilijaš	8,78
5	Mi99 d.o.o. Gradačac	8,21
6	MilkoS d.d. Sarajevo	7,55
7	Mljekara Pađeni d.o.o. Plana, Bileća	3,83
8	Mljekara Livno d.o.o. Livno	2,42
9	Poljorad d.o.o. Turbe, Travnik	1,66
10	Vita-Vi d.o.o. Gabela polje, Čapljina	1,44
11	Miljc Produkt Smajić d.o.o. Čelić	1,27
12	Eko Sir Puđa d.o.o. Livno	1,16
13	D.o.o.Mljekara Dule, Srednji Dragaljevac, Bjeljina	0,99
14	Noćko Komerc d.o.o. Živinice	0,96
15	D.o.o. Čapljanica Sanski Most	0,73
16	Mljekara Rakitno d.o.o. Posušje	0,56
17	Euro-Food d.o.o. Sarajevo	0,54
18	Farma Arsenić d.o.o. Kozarska Dubica	0,33
19	OPZ Zlatna Kap p.o. Jelah, Tešanj	0,33
20	ZIM d.d. Zenica	2,91
21	AS Holding	-
	Ukupno	100,00
	Ukupno (20+21)	2,91

Izvor:Prijava

Prema podacima koje je Podnosilac prijave dostavio Konkurencijskom vijeću, učešće privrednog subjekta ZIM na relevantnom tržištu u Bosni i Hercegovini je 2,91%.

6. Ocjena Prijave koncentracije

Obaveza prijave koncentracije postoji ukoliko su ispunjeni uslovi iz člana 14. stav 1) pod a) i b) Zakona, odnosno ako ukupni prihod svih učesnika koncentracije ostvaren prodajom roba i/ili usluga na svjetskom tržištu iznosi 100.000.000,00 KM po završnom računu u godini koja je prethodila koncentraciji i da ukupni godišnji prihod svakog od najmanje dva privredna subjekta učesnika koncentracije ostvaren prodajom roba i /ili usluga na tržištu Bosne i Hercegovine iznosi najmanje 8.000.000,00 KM, ili ako je njihovo zajedničko tržišno učešće na relevantnom tržištu veće od 40%.

Prema podacima iz Prijave, ukupni godišnji prihodi privrednih subjekata učesnika koncentracije, na dan 31. decembar 2017. godine, kao godini koja prethodi koncentraciji, iznose:

Tabela 3.

R.br.	Naziv privrednog subjekta	Prihod ostvaren na tržištu u BiH izražen u KM	Prihod na svjetskom tržištu izražen u KM
1.	AS Holding	(..)**	-
2.	ZIM Zenica	(..)**	-

Izvor: podaci iz Prijave

Godišnji prihodi učesnika koncentracije (Tabela 3.) predstavljaju ukupne prihode (bez poreza na dodatnu vrijednost i drugih poreza koji se direktno odnose na učesnike koncentracije na tržištu Bosne i Hercegovine), u smislu člana 9. tačka h) Odluke o načinu podnošenja prijave i kriterijumima za ocjenu koncentracija privrednih subjekata.

Konkurencijsko vijeće je utvrdilo (Tabela 3.) da učesnici predmetne koncentracije nisu ispunili uslov ukupnog godišnjeg prihoda na tržištu Bosne i Hercegovine u smislu člana 14. stav (1) tačka b) Zakona.

Takođe, učesnici koncentracije nisu ispunili niti uslov tržišnog udjela jer njihov zajednički tržišni udio na relevantnom tržištu nije veći od 40,0%, u smislu člana 14. stav (1) tačka b) Zakona.

Budući da učesnici koncentracije nisu ispunili uslove iz člana 14. stav (1) Zakona, ne podliježu obavezi prijave koncentracije.

Uzimajući u obzir izneseno Konkurencijsko vijeće je odlučilo kao u dispozitivu ovoga Zaključka.

7. Administrativna taksa

Podnosilac prijave na ovaj Zaključak, u skladu sa članom 2. tarifni broj 108. tačka c) Odluke o visini administrativnih taksi u vezi s procesnim radnjama pred Konkurencijskim vijećem («Službeni glasnik BiH», br. 30/06 i 18/11) je dužan platiti administrativnu taksu u iznosu od 1.000,00 KM, u korist Budžeta institucija Bosne i Hercegovine.

8. Pouka o pravnom lijeku

Protiv ovog Zaključka nije dozvoljena žalba.

Nezadovoljna strana može pokrenuti upravni spor pred Sudom Bosne i Hercegovine u roku od 30 dana od dana prijema, odnosno objavljivanja ovog Zaključka.

Predsjednica

Adisa Begić